

四庫全書

史部

欽定四庫全書

史部

舊唐書卷四十三

詳校官編修臣曹城

洗馬臣王坦修覆勘

覆校官主事臣李駿

校對官中書臣王鍾泰

謄錄舉人臣劉禮

欽定四庫全書

舊唐書卷四十三

後晉司空同中書門下平章事劉

昫撰

職官志第二十三

職官二

太師太傅太保各一員

謂之三師並正一品後漢初太傅置府寮至周隋三師不置府

寮初拜於尚書省上隋煬帝廢三師之官武德復置一如隋制

三師訓導之官天子所

師法太抵無所統職然非道德崇重則不居其位無其

人則闕之

太尉司徒司空各一員

謂之三公並正一品魏晉至北齊三公置府寮隋初亦置府寮

初拜於尚書省上唐因之武德初太宗為之其後親王拜三公皆不視事祭祀則攝者行也

三公論

道之官也蓋以佐天子理陰陽平邦國無所不統故不以一職名其官大祭祀則太尉亞獻司徒奉俎司空掃除

尚書都省

龍朔二年改為中臺光宅元年改為文昌臺神龍初復

尚書省領二十

四司

六尚書各分領四司

尚書令一員

正二品武德中太宗為之自是闕而不置

令總

領百官儀刑端揆其屬有六尚書一曰吏部二曰戶部

三曰禮部四曰兵部五曰刑部六曰工部凡庶務皆會

而決之左右僕射各一員

從二品龍朔二年改為左右匡政光宅元年改為文昌左

右相開元元年改為左右丞相天寶元年復為左右僕射

掌統理六官綱紀庶務以

貳令之職自不置令僕射總判省事御史糾劾不當兼

得彈之左右丞各一員

左丞正四品上右丞正四品下龍朔改為左右肅機咸亨復永

昌元年昇為從三品也如意元年復四品也

左丞掌管轄諸司糾正省内勾

吏部戶部禮部十二司通判都省事若右丞闕則併行

之右丞管兵部刑部工部十二司若左丞闕右丞兼知

其事御史有糾劾不當兼得彈之左右司郎中各一員

並從五品上隋置武德初省貞觀初復置龍朔二年改為左右丞務咸亨復也左司郎中副左

丞所管諸司事省署鈔目勘稽失知省內宿直之事若

右司郎中闕則併行之左右司員外郎各一員

天后永昌元年

置左右司員外郎各一人神龍初省後復置左右司郎中員外郎各掌副十

有二司之事以舉正稽違省署符目焉凡都省掌舉諸

司之綱紀與百寮之程式以正邦理以宣邦教凡上之

所以迨下其制有六曰制勅冊令教符

天子曰制曰勅曰冊皇太子曰

令親王公主曰教尚書省下於州州下縣縣下鄉皆曰符也

凡下之所以達上其制

亦有六曰表狀牋啟辭牒

表上於天子其近臣亦為狀牋啟上皇太子然於其長亦

為之非公文所施有品已上公文皆曰牒庶人言曰辭也

諸司自相質問其義有三

關刺移

關謂關通其事刺謂刺舉之移謂移其事於他司移則通判之官皆連署也

凡內外

百司所受之事皆印其發日為之程限凡尚書省施行

制勅案成則給程以鈔之若急速者不出其日若諸州

計奏達于京師量事之大小與多少以為之節凡京師

諸司有符移關牒下諸州者必由於都省以遣之凡文案既成勾司行朱訖皆書其上端記年月日納諸庫凡施行公文應印者監印之官考其事目無差然後印之必書於歷每月終納諸庫凡尚書省官每日一人宿直都司執直簿轉以為次凡內外百寮日出而視事既午而退有事則直官省之其務繁不在此例凡天下制勅計奏之數省符宣告之節率以歲終為斷京師諸司皆以四月一日納于都省其天下諸州則本司推校以授

勾官勾官審之連署封印附計帳使納于都省常以六月一日都事集諸司令史對覆若有隱漏不同皆附于考課焉主事六人從九品上令史十八人書令史三十六人亭長六人掌固十四人凡令史掌案文簿亭長掌固檢校省門戶倉庫廳事陳設之事也

吏部尚書一員

正三品龍朔二年改為司列太常伯光宅元年改為天官尚書神龍復為吏部

尚書

侍郎二員

正四品上隋煬帝大業三年尚書六曹各置侍郎一人以貳尚書之職並正四

品國家定令諸曹侍郎降為正四品下唯吏部侍郎為正四品上龍朔改為司列少常伯咸亨復總章元年吏

部兵部各增置
侍郎一員也

尚書侍郎之職掌天下官吏選授勲

封考課之政令其屬有四一曰吏部二曰司封三曰司

勲四曰考功總其職務而行其制命凡中外百司之事

由於所屬皆質正焉凡選授之制每歲集於孟冬去王

城五百里之內以上旬千里之內以中旬千里之外以

下旬尚書侍郎分為三銓

尚書為尚書銓侍郎二
人分為中銓東銓也

凡擇

人以四才校功以三實

四才謂身言書判其優長者有
可取焉三實謂德行才用勞効

德均以才才均以勞勞
必考其實而進退之

較之優劣而定其留放所以正

權衡明與奪抑貪冒進賢能然後據其官資量其注擬

五品已上以名上中書門下聽制授其官六品已下量資注定其才識頗高可擢為拾遺補闕監察御史者亦

以名送中書門下聽勅授

其有歷職清要考第頗深者得隔品授之

不然即否凡出身非清流者不注清資官凡注官若官

資未相當及以為非便者聽至三注凡伎術之官皆本

司定送吏部附甲凡同司聯事勾檢之官皆不得注大

功已上親凡皇親諸親及軍功兼注員外郎凡注擬必

先具官階團甲送門下以聞

注官階高擬卑曰行階卑擬高曰守三銓注擬訖皆

當銓團甲過左右僕射若中銓東銓則過尚書訖乃上門下省給事中讀黃門侍郎省侍中審然後進甲以聞聽旨授而施行焉若左右僕射門下批官不當者別改注亦當重職而上者也凡大選終於季

春之月

若選人有身在軍旅則軍中試書判封送吏部亦有春中不解而後集謂之春選若優勞人有

勅則有處分及即與官者並聽非時選一百日內注擬之所以定九流之品格補萬

方之闕政官人之道備焉

郎中二員

並從五品上龍朔為司列大夫

咸亨光宅並
隨曹改也

員外郎二員

並從六品上

令史三十人書令史

六十人亭長八人掌固十二人郎中一人掌考天下文吏之班秩階品凡叙階二十有九品在都序自一品至

九品品有上下凡散官四品已下九品已上並於吏部

當番上下

其應當番四十五日若都省須人送符諸司須人者並兵部吏部散官上經兩番已上聽

簡入選不第者依番名不過五六也凡叙階之法有以封爵有以親戚有

以勲庸有以資蔭有以秀孝有以勞考有除免而復叙

者皆循法以申之無或枉冒凡應入三品五品者皆待

別制而進之不然則否凡文武百寮之班序官同者先

爵爵同者先齒凡京司有常叅者

謂五品以上職事官八品已上供奉官員

外郎監察御史太常博士

供奉官

兩省自侍中中書令已下盡名供奉官

諸司長官清

望官四品已下八品已上清官每日以六品已上清官

兩人待制於衙

供奉官宿衛官不在此例

凡授四品已下清望官才

職相當不應退讓凡職事官應覲省及移疾不得過程
年七十已上應致仕若齒力未衰亦聽釐務凡官人身
及同居大功已上親自執工商家專其業及風疾使洒
皆不得入仕凡内外官有清白著聞應以名薦則中書
門下改授五品已上量加升進六品已下有付吏部即
量等第遷轉若第二第三等人五品已上改日稍優之

六品已下秩滿聽選不在放限其嶺南黔中三年一置

選補使號為南選凡天下官吏各有常員凡諸司置直

皆有定數

諸司諸色有品直官

内外官吏則有假寧之節行李之

命簿書景迹功賞殿最具員與員外郎分掌之郎中一

人掌小銓亦分為九品通謂之行署以其在九流之外

故謂之流外銓亦謂之小選其校試銓注與流內銓略

同其吏部兵部禮部考功都省御史臺中書門下謂之

前八司其餘則曰後行凡擇流外取工書計兼頗曉時

務

三事中有一優長則在叙限

每經三考轉選量其才能而進之不

則從舊任

小銓舊委郎中專知開元二十五年又勅銓試訖留放皆尚書侍郎定之也

員外

郎一人掌判南曹

曹在選曹之南故謂之南曹

每歲選人有解狀簿

書資歷考課必由之以覈其實乃上三銓其三銓進甲

則署焉

員外郎一人掌判曹務凡預太廟齋郎帖試

如貢舉之制

司封郎中一員

從五品上隋曰主爵郎武德因之龍朔二年改為司封大夫光宅改司封郎中

也

司封員外郎一員

從六品上

主事二人

從九品上

令史四人書

令史九人掌固四人 司封郎中員外郎之職掌國之

封爵凡有九等

一曰王正一品食邑一萬戶二曰郡王從一品食邑五千戶三曰國公從一品

食邑三千戶四曰郡公正二品食邑二千戶五曰縣公從二品食邑一千五百戶六曰縣侯從三品食邑一千戶七曰縣伯正四品食邑七百戶八曰縣子正五品食邑五百戶九曰縣男從五品食邑三百戶 凡名

山大川及畿內諸縣皆不以封至郡公有餘爵聽廻授子孫其國公皆特封凡天下觀有定數每觀立三綱以道德高者充凡三元諸齋曰修金錄明真等齋凡道士女道士簿籍三年一造凡外命婦之制皇之姑封大長

公主皇姊妹封長公主皇女封公主皆視正一品皇太子之女封郡主視從一品王之女封縣主視正二品王母妻為妃一品及國公母妻為國夫人三品已上母妻為郡夫人五品若勲官三品有封母妻為縣君散官並司職事勲官四品有封母妻為鄉君其母邑號皆加太字各視其夫子之品若兩有官爵者從其高若內命婦一品之母為正四品郡君二品之母為從四品郡君三品四品之母並為正五品郡君凡婦人不因夫及子而

別加邑號夫人云某品夫人郡君為某品郡君縣君鄉
君亦然凡庶子有五品已上官皆封嫡母無嫡母封所
生母凡二王後夫人職事五品已上散官三品已上王
及國公母妻朝叅各視其夫及子之禮凡親王孺人二
人視正五品媵十人視正六品嗣王郡王及一品媵十
人視從六品二品媵八人視正七品三品及國公媵六
人視從七品四品媵四人視正八品五品媵三人視從
八品降此外皆為妾凡皇家五等親及諸親三等存亡

昇降皆立簿書籍每三年一造除附之制並載於宗寺

司勲郎中一員

從五品上隋曰司勲郎武德初乃加中字龍朔改為司勲大夫咸亨復也

司勲員外郎二員

從六品上

主事四人

從九品上

令史三十三人

書令史六十人掌固四人

郎中員外郎之職掌邦國

官人之勲級凡勲十有二轉為上柱國比正二品十一

轉為柱國比從二品十轉為上護軍比正三品九轉為

護軍比從三品八轉為上輕車都尉比正四品七轉為

輕車都尉比從四品六轉為上騎都尉比正五品五轉

為騎都尉比從五品四轉為驍騎尉比正六品三轉為飛騎尉比從六品二轉為雲騎尉比正七品一轉為武騎尉比從七品凡有功效之人合授勲官者皆委之覆定然後奏擬

考功郎中一員

從五品上龍朔二年改為司績大夫咸亨初乃復

考功員外郎

一員

從五品上龍朔改為司績員外郎咸亨復

主事三人

從八品上

令史十三人

書令史二十五人掌固四人郎中員外郎之職掌內外文武官吏之考課凡應考之官家具錄當年功過行

能本司及本州長官對衆讀議其優劣定為九等考第
各於所由司準額校定然後送省內外文武官量遠近
以程之有差附朝集使送簿至省每年別勅定京官位
望高者二人其一人校京官考一人校外官考又定給
事中中書舍人各一人其一人監京官考一人監外官
考郎中判京官考員外判外官考其檢覆同者皆以功過
上使京官則集應考之人對讀注定外官對朝集使注
定凡考課之法有四善一曰德義有聞二曰清慎明著

三曰公平可稱四曰恪勤匪懈善狀之外有二十七最
其一曰獻可替否拾遺補闕為近侍之最其二曰銓衡
人物擢盡才良為選司之最其三曰揚清激濁褒貶必
當為考校之最其四曰禮制儀式動合經典為禮官之
最其五曰音律克諧不失節奏為樂官之最其六曰決
斷不滯與奪合理為判事之最其七曰都統有方警守
無失為宿衛之最其八曰兵士調習戎裝充備為督領
之最其九曰推鞠得情處斷平允為法官之最其十曰

讐校精審明於刊定為校正之最其十一曰承旨敷奏吐納明敏為宣納之最其十二曰訓導有方生徒充業為學官之最其十三曰賞罰嚴明攻戰必勝為將帥之最其十四曰禮義興行肅清所部為政教之最其十五曰詳錄典正辭理兼舉為文吏之最其十六曰訪察精審彈舉必當為糾正之最其十七曰明於勘覆稽失無隱為勾檢之最其十八曰職事修理供承強濟為監掌之最其十九曰功課皆充丁匠無怨為役使之最其二十

十曰耕耨以時收穫成課為屯官之最其二十一曰謹於蓋藏明於出納為倉庫之最其二十二曰推步盈虛究理精密為歷官之最其二十三曰占候醫卜効驗居多為方術之最其二十四曰譏察有方行旅無壅為關津之最其二十五曰市廛不擾姦濫不作為市司之最其二十六曰牧養肥碩蕃息孳多為牧官之最其二十七曰邊境肅清城隍修理為鎮防之最一最以上有四善為上上一最以上有三善或無最而有四善為上中

一最以上為二善或無最而有二善為中上一最以上或無最而有一善或無最而有二善為中上一最以上或無最而有一善為中中職事粗理善最不聞為中下愛憎任情處斷乖理為下上背公向私職務廢闕為下中居官諂詐貪濁有狀為下下若於善最之外別可嘉尚及罪雖成殿情狀可矜雖不成殿而情狀可責者省校之日皆聽考官臨時量定內外官從見任改為別官者其年考從日申校百司量其閑劇諸州據其上下進考之人

皆有定限苟無其功不要充數功過於限亦聽量進其
流外官本司量其行能功過立四等考第而勉進之凡
親勲翊衛皆有考第考第之中略有三等衛主帥如三
衛之考其監門校尉直長如主帥之考凡諡議之法古
之通典皆審其事以為旌別

戶部尚書一員

正三品隋為民部尚書貞觀二十三年改為戶部明慶元年改為度支龍朔二

年改為司元太常伯光宅元年侍郎二員

正四品下因隋已來改易

名位皆隨尚書也

尚書侍郎之職掌天下田戶均輸錢穀之

政令其屬有四一曰戶部二曰度支三曰金部四曰倉部總其職務而行其制命凡中外百司之事由於所屬

皆質正焉

郎中二員

並五品上

員外郎二員

從六品上郎中員外自隋

已來隨曹改易

主事四人

從九品上

令史十五人書令史三十四人

亭長六人掌固十人

郎中員外之職掌分理戶口井

田之事凡天下十道任土所出為貢賦之差凡天下之州府三百一十有五而羈縻之州迨八百焉四萬戶已上為上州二萬戶以上為中州不滿為下州凡三都之

縣在內曰京縣城外曰畿又望縣有八十五焉其餘則
六千戶以上為上縣二千戶已上為中縣一千戶已上
為中下縣不滿一千戶皆為下縣凡天下之戶八百一
萬八千七百一十口四千六百二十八萬五千一百五
十一百戶為里五里為鄉兩京及州縣之郭內分為坊
郊外為村里及坊村皆有正以司督察四家為隣五隣
為保保有長以相禁約凡男女始生為黃四歲為小十
六為中二十有一為丁六十為老每一歲一造計帳三

年一造戶籍縣以籍成于州州成于省戶部總而領焉
凡天下之戶量其資定為九等每定戶以仲年造籍以
季年州縣之籍恒留五日省籍留九日凡戶之兩貫者
先從邊州為定次從關內次從軍府州若住者各從其
先貫焉樂住之制居狹鄉者聽其從寬居遠道者聽其
從近居輕役之地者聽其從重辨天下之四民使各專
其業習學文武者為士肆力耕桑者為農巧作器用者
為工屠沽興販者為商工商之家不得預於士食祿之

人不得奪下人之利凡天下之田五尺為步步二百有四十為畝畝百為頃度其肥瘠寬狹以居其人凡給田之制有差園宅之地亦如之凡給口分田皆從便近居城之人本縣無田者則隔縣給授凡應收授之田皆起十月畢十二月凡授田先課後不課先貧後富先多後少凡州縣界內所部受田悉足者為寬鄉不足者為狹鄉凡官人及勲授永業田凡天下諸州有公廨田凡諸州及都護府官人有職分田凡賦人之制有四一曰租

二曰調三曰役四曰課戶每丁租粟二石其調隨鄉土所產綾絹絕各二丈布加五分之一輸綾絹者綿三兩輸布者麻三斤皆書印焉凡丁歲役二旬無事則收其庸每日三尺有事而加役者旬有五曰免調三旬則租調俱免凡庸調之物仲秋歛之季秋發於州租則準州土收穫早晚量事而斂之仲冬起輸孟春而納畢本州納者季冬而畢凡諸國蕃胡內附者亦定為九等凡嶺南諸州稅米及天下諸州稅錢各有準常凡丁戶皆有

優復蠲免之制若孝子順孫義夫節婦志行聞於鄉閭者州縣申省奏聞而表其門閭同籍悉免課役有精誠致應者則加優賞焉凡京師文武職事官皆有防闔凡州縣官寮皆有白直凡州縣官及在外監官皆有執衣凡諸親王府屬並給士力具品數如白直凡有功之臣賜實封者皆以課戶充凡食封皆傳于子孫凡庶人年八十及篤疾給侍丁一人九十給二人百歲三人凡天下朝集使皆以十月二十五日至京師十一月一日戶

部引見訖於尚書省與羣官禮見然後集于考堂應考績之事元日陳其貢篚於殿廷凡京都諸縣令每季一

朝

度支郎中一員

從五品上龍朔改為
司度大夫咸亨復

員外郎一員

從六
品上

主事二人

從九
品上

令史十六人書令史三十三人計史一

人掌固四人

郎中員外之職掌判天下租賦多少之

數物產豐約之宜水陸道途之利每歲計其所出而度其所用轉運徵斂送納皆準程而節其遲速凡和糴和

市皆量其貴賤均天下之貨以利於人凡金銀寶貨綾羅之屬皆折庸調以造凡天下舟車水陸載運皆具為脚直輕重貴賤平易險澁而為之制凡天下邊軍有支度使以計軍資糧仗之用每歲所費皆申度支會計以長行旨為準

金部郎中一員

從五品上龍朔為司珍大夫咸亨復

員外郎一員

從六品上

主

事三人

從九品上

令史八人書令史二十一人計史一人掌

固四人

郎中員外郎之職掌判天下庫藏錢帛出納

之事頒其節制而司其簿領凡度以北方秬黍中者一
黍之廣為分十分為寸十寸為尺一尺二寸為大尺十
尺為丈凡量以秬黍中者容一千二百為龠二龠為合
十合為升十升為斗三斗為大斗十斗為斛凡權衡以
秬黍中者百黍之重為銖二十四銖為兩三兩為大兩
十六兩為斤凡積秬黍為度量權衡調鐘律測晷景合
湯藥及冠冕之制用之内外官私悉用大者凡庫藏出
納皆行文牒季終會之若承命出納則於中書門下省

復而行之百司應請月俸符牒到所由皆遮覆而行之
乃置木契與應出物之司相合凡官私互市物數有制
凡縑帛之類有長短廣狹端疋屯綬之差凡賜十段其
率絹三疋布三端綿三屯若雜綵十段則絲布二疋紬
二疋綾二疋縵四疋若賜蕃客錦綵率下段則錦一張
綾二疋縵三疋綿四屯凡遣使覆囚則給時服若諸使
經二年不還亦如之凡時服稱一具者全給之一副者
減給之正冬之會稱束帛有差者皆賜絹五品已上五

正六品已下三正命婦視其夫子

倉部郎中二員

從五品上龍朔為司度大夫咸亨復也

員外郎一員

從六品上

主事三人

從九品上

令史九人書令史二十人計史一人掌

固四人

郎中員外之職掌判天下倉儲受納租稅出

給祿廩之事凡中外文武官品秩有差歲再給之乃置

木契一百枚以與出給之司合諸司官人及諸色人應

給食者皆給米凡致仕之官五品已上及解官充侍者

各給半祿即遷官者通計前祿以充後數凡都已東租

納含嘉倉自含嘉轉運以實京太倉自洛至陝為陸運
自陝至京為水運置使以監充之凡王公已下每歲田
苗皆有簿書凡義倉所以備歲不足常平倉所以均貴
賤也

禮部尚書一員

正三品隋舊龍朔改為司禮太常伯光宅改為春官尚書神龍復也

侍郎

一員

正四品下名因隋曹改易也

尚書侍郎之職掌天下禮儀祭

享貢舉之政令其屬有四一曰禮部二曰祠部三曰膳
部四曰主客總其職務而行其制命凡中外百司之事

由於所屬皆質正焉凡舉試之制每歲仲冬率與計偕

其科有六一曰秀才

試方畧策五條此科取人稍峻貞觀已後遂絕

二曰明經

三曰進士四曰明法五曰書六曰算凡此六科求人之

本必取精究理實而昇為第其有博綜兼學須加甄獎

不得限以常科其弘文崇文館學生雖同明經進士以

其資蔭全高試取粗通文義其郊社齋郎簡試如太廟

齋郎其國子監大成十二員取明經及第人聰明灼然

者試日誦千言并口試仍策所習業十條通七然後補

充各授散官依舊令於學內習業以通四經為限郎

中一員

從五品上

員外郎一員

從六品上隋曰儀曹郎武德改禮部郎中員外龍朔為司

禮大夫司禮員外咸亨復

主事二人

從八品上

令史五人書令史十一人

亭長六人掌固八人郎中員外郎之職掌貳尚書侍

郎舉其儀制而辯其名數凡五禮之儀一百五十有二

一曰吉禮其儀五十有五二曰賓禮其儀有六三曰軍

禮其儀二十有三四曰嘉禮其儀五十五曰凶禮其儀

一十有八凡元日大陳設於含元殿服袞冕臨軒展宮

懸之樂陳歷代寶玉輿輅備黃麾仗二王後及百官朝
集使皇親並朝服陪位大會之日陳設如初凡冬至大
陳設如元正之儀其異者無諸州表奏祥瑞貢獻凡元
正冬至大會之明日百官朝集使等皆詣東宮慶賀凡
千秋節御樓設九部之樂百官袴褶陪位凡京司文武
職事九品已上每朔望朝參五品已上及供奉官員外
郎監察御史太常博士每日參凡諸蕃國來朝皆設宮
懸之樂及黃麾仗若蕃國使則減黃麾之半凡冊皇后

太子太子妃諸王諸王妃公主並臨軒冊命陳設如冬正之儀訖皆拜太廟凡祥瑞皆辯其名物有大瑞上瑞中瑞皆有等差凡太陽虧所司預奏其日置五鼓五兵於太社而不視事百官各素服守本司不聽事過時乃罷月蝕則擊鼓於所司若五嶽四鎮四瀆崩竭皆不視事三日凡二分之一月三公巡行山陵則太常卿為之副凡百官拜禮各有差致敬之士若非連屬應敬之官相見或自親戚者各從其私禮凡樂有五聲八音六律六

呂陳四懸之度分二舞之節以和人倫以調節氣以享鬼神以序賓客凡私家不得設鐘磬三品已上得備女樂五品女樂不得過三人居大功已上喪受冊及之官雖有鼓樂從而不作凡太廟太社及諸宮殿門東宮及一品已下諸州施戟有差凡內外百官皆給銅印有魚符之制並出於門下省凡服飾尚黃旗幟尚赤天子皇后太子已下之服事在輿服志也凡百寮冠笏繖幘珂珮各有差常服亦如之凡凶服不入公門凡授都督刺史階未入五品

者並聽著緋珮魚離任則停凡文武官赴朝詣府導從各有差凡職事官薨卒有賻贈柳窰碑碣各有制度

祠部郎中一員

從五品上龍朔為司禮大夫咸亨復

員外郎一員

從六品上

主

事二人

從九品上

令史五人書令史十一人亭長六人掌固

八人郎中員外郎之職掌祠祀享祭天文漏刻國忌

廟諱卜筮醫藥僧尼之事凡祭祀之名有四一曰祀天

神二曰祭地祇三曰享人鬼四曰釋奠于先聖先師其

差有三若昊天上帝皇地祇神州宗廟為大祀

祀天地皆以祖

宗配
享

日月星辰社稷先代帝王岳鎮海瀆帝社先蠶孔
宣父齊太公諸太子廟為中祀司中司命風師雨師衆
星山林川澤五龍祠等及州縣社稷釋奠為小祀大祀
皇帝親祭則太尉為亞獻光祿卿為終獻若有司攝事
則太尉為初獻太常卿為亞獻凡大祀散齋四日致齋
三日大祀齋官皆於散齋日平明集尚書省受誓誡中
祀散齋三日致齋二日小祀散齋二日致齋一日皆祀
前習禮沐浴並給明衣凡官爵二品已上祠四廟五品

已上祠三廟六品已下達於庶人祭祖禩而已凡國有封禪之禮則依圓丘方澤之神位凡天下寺有定數每

寺立三綱以行業高者充

諸州寺總五千三百五十八所三千二百三十五所僧二

千一百二十二所尼每寺上座一人寺主一人都維那一人

凡僧簿籍三年一造凡

別勅設齋應行道並官給料凡國忌日兩京大寺各二以散齋僧尼文武五品已上清官七品已上皆集行香而退天下州府亦然凡遠忌日雖不廢務然非軍務急切亦不舉事餘如常式

膳部郎中一員

從五品上龍朔為司膳大夫咸亨復也

員外郎一員

從六品上

主事二人

從九品上

令史四人書令史九人掌固四人郎

中員外郎之職掌邦之祭器牲豆酒膳辨其品數及藏冰食料之事

主客郎中一員

從五品上隋曰司蕃郎武德改主客郎中龍朔為司蕃大夫咸亨復

員外

郎一員

從六品上

主事二人

從九品上

令史四人書令史九人掌

固四人

郎中員外郎之職掌二王後及諸蕃朝聘之

事二王之後鄯公介公凡四蕃之國經朝貢之後自相

誅絕及有罪滅者蓋三百餘國今所存者七十餘蕃其
朝貢之儀享宴之數高下之等往來之命皆載於鴻臚
之職焉

兵部尚書一員

正三品南朝謂之五兵尚書隋曰兵部尚書龍朔改為司戎太常伯咸亨復也

侍郎二員

正四品下龍朔為司戎少常伯咸亨復

尚書侍郎之職掌天

下武官選授及地圖與甲仗之政令其屬有四一曰兵
部二曰職方三曰駕部四曰庫部總其職務而行其制
命凡中外百官之事由於所屬咸質正焉凡選授之制

每歲集於孟冬去王城五百里以上旬千里之內以中

旬千里之外以下旬尚書侍郎分為三銓尚書為中銓侍郎分東西

凡試能有五五謂長槩馬步射馬槍步射應對互有優長即可取之較異有三三謂

驍勇藝及可為統領之用也審其功能而定其留放所以錄才藝備

軍國辯虛冒敘勲勞也然後據其資勞量為注擬五品已上

送中書門下六品已下量資注定其在軍鎮要籍不得赴選委節度使銓試其等第申省凡官階注

擬團甲進甲皆如吏部之制凡大選終於季春之月所

以約資敘之淺深審才畧之優劣軍國之用在焉郎

中二員

從五品上龍朔為司戎大夫咸亨復也

員外郎二人

從六品上

主事四

人

從六品下

令史三十人書令史六十人亭長八人掌固十

二人

郎中一員掌判帳及天下武官之階品衛府之

名數凡敘階有二十九將軍之階

具於敘目

凡敘階之法一

如文散官之制凡天下之府五百九十有四有上中下

並載於諸衛之職凡應宿衛官各從番第凡千牛備身

左右及太子千牛備身皆取三品已上職事官子孫四

品清官子儀容端正武藝可稱者充五考本司隨文武

簡試聽選

四品謂諸司侍郎左右庶子也

凡殿中省進馬取左右衛三

衛及高蔭簡儀容可觀者補充簡試同千牛例僕寺進

馬亦如之五品已下七品已上五年多至八年年滿簡

送吏部不第者如初無文聽以武選凡左右衛親衛勲

衛翊衛及左右率府親勲翊衛及諸衛之翊府通謂之

三衛擇其資蔭高者為親衛其次者為勲衛及率府之

親衛又次者為翊衛及率府之勲衛又次者為翊衛及

率府之翊衛又次者為親王府之執仗執乘量遠邇以

定其番第應補之人周親已上有犯刑戮者配令兵部
上下凡諸衛及率府三衛貫京兆河南蒲同華岐陝懷
汝鄭等州皆令番上餘州皆納資凡左右衛之三衛分
為五仗凡王公已下皆有親事帳內限年十八已下舉
諸州率萬人以充之皆限十周年則聽其簡試文理高
者送吏部其餘留本司全下者退還本色凡兵士隸衛
各有其名左右衛曰驍騎左右驍衛曰豹騎左右武衛
曰熊渠左右威衛曰羽林左右領軍衛曰射聲左右金

吾衛曰欽飛東宮左右衛率府曰超乘左右司禦率府曰旅賁左右清道率府曰直蕩總名曰衛士皆取六品已下子孫及白丁無職役者點充凡三年一簡點成丁而入六十而免量其遠邇無定番第凡衛士各立名簿其三年已來征防差遣仍定優劣為三等每年正月十日送本府印記仍錄一道送本衛府若有差行上番折衝府據簿而折之凡差衛士征戍鎮防亦有團伍其善弓馬者為越騎團餘為步兵團主帥已下統領之火十

人有六馱馬若父兄子弟不併遣之若祖母老疾家
無兼丁免征行及番上其居常則皆習射唱大角歌番
集之日府官率而課試凡左右金吾衛有角手諸衛有
弩手左右羽林軍有飛騎及左右萬騎彊騎天下諸軍
有健兒皆定其名籍每季上中書門下凡關內有團結
兵秦成岷渭河蘭六州有高麗羌兵黎雅邛翼茂五州
有鎮防團結兵天下諸州差兵募取戶殷丁多人材驍
勇選前資官勲官部分強明堪統攝者節級擢補主帥

以領之其義征者別為行伍不入募人之營凡軍行器物皆於當州分給之如不足則令自備貧富必以均焉凡諸州軍府應行兵之名簿器物之多少皆申兵部軍散之日亦錄其存亡多少以申而勘會之凡諸道廻兵糧糒之物衣資之費皆令所在州縣分給之郎中一人掌判簿以總軍戎差遣之名數凡天下節度使有八若諸州在節度內者皆受節度焉其福州經畧使登州平海軍則不在節度之內

節度名與所管軍鎮名並見地理志也

凡親王

總戎曰元帥文武官總統者則曰總管以奉使言之則曰節度使有大使副使判官若大使加旌節以統軍置木契以行凡將帥出行兵滿一萬人已上置長史司馬倉曹兵曹冑曹等叅軍各一人五千人已上減司馬諸軍各置使一人五千人已上置副使一人一萬人已上置營田副使一人每軍各有倉兵冑三叅軍其橫海高陽唐興恒陽北平等五軍皆本州刺史為使凡鎮皆有使一人副使一人萬人已上置司馬倉兵二曹叅軍五

千人已下減司馬凡諸軍鎮每五百人置押官一人千人置子總管一人五千人置總管一人凡諸軍鎮使副使已上皆四年一替總管已下二年一替押官隨兵交替凡諸軍鎮大使副使已下皆有僦人別奏以從之凡幸三京即東都南北衙皆置左右屯營別立使以統之若在都則京城亦如之凡大將出征皆告廟授鉞辭齊太公廟訖不宿於家臨軍對寇士卒不用命並得專行其罰既捷及軍未散皆會衆而書勞與其費用乃告太

廟元帥凱旋之日皆使郊勞有司先獻捷於太廟又告齊太公廟 員外郎一人掌貢舉及雜請之事凡貢舉每歲孟春亦與計偕有二科一曰平射二曰武舉凡科之優劣勲獲之等級皆審其實而受署焉 員外郎一人掌判南曹每歲選人有解狀簿書資歷考課必由之以覈其實乃上三銓進甲則署焉

職方郎中一員

從五品上龍朔為司域大夫也

員外郎一員

正六品上

主事

二人

從九品上

令史四人書令史九人掌固四人

郎中員

外郎之職掌天下地圖及城隍鎮戍烽堠之數辯其邦國都鄙之遠近及四夷之歸化凡五方之區域都邑之廢置疆場之爭訟者舉而正之凡天下上鎮二十中鎮九十下鎮一百三十五上戍十有一中戍八十六下戍二百四十五凡烽堠所置大率相去三十里其逼邊境者築城置之每烽置帥一人副一人凡州縣城門及倉庫門須有備守

駕部郎中一員

從五品上龍朔為司輿大夫也

員外郎一人

從六品上

主事

三人

從九品上

令史十人書令史二十人掌固四人

郎中

員外郎之職掌邦國輿輦車乘傳驛廐牧官私馬牛雜畜簿籍辯其出入司其名數凡三十里一驛天下驛凡一千六百三十九而監牧六十有五皆分使統之若畜養之宜孳生之數皆載於太僕之職凡諸衛有承直之馬凡諸司有備運之牛皆審其制以定數焉

庫部郎中一員

從五品上龍朔為司庫大夫也

員外郎一員

從六品上

主事

二人

從九品上

令史七人書令史十五人掌固四人郎中

員外郎之職掌邦國軍州戎器儀仗凡元正冬至陳設并祠祭喪葬所貢之物皆辯其出入之數量其繕造之功以分給焉

刑部尚書一員

正三品隋初改都官尚書又改為刑部龍朔改為司刑太常伯先宅改為秋官

尚書神龍復也

侍郎一員

正四品下龍朔為司刑少常伯

尚書侍郎之職掌

天下刑法及徒隸勾覆闕禁之政令其屬有四一曰刑部二曰都官三曰比部四曰司門總其職務而行其制命凡中外百司之事由於所屬咸質正焉郎中二員

從五品上隋曰憲部郎武德為
刑部郎中龍朔改為司刑大夫
員外郎二員從六品上主事

四人從九品上令史十九人書令史三十八人亭長六人掌

固十人郎中員外郎之職掌貳尚書侍郎舉其典憲

而辯其輕重凡文法之名有四一曰律二曰令三曰格

四曰式凡律十有二章一名例二禁衛三職制四戶婚

五廩庫六擅興七賊盜八鬪訟九詐偽十雜律十一捕

亡十二斷獄而大凡五百條令二十有七篇分為三十

卷第一至第七曰官品職員八祠九戶十選舉十一考

課十二宮衛十三軍防十四衣服十五儀制十六鹵簿
十七公式十八田十九賦役二十倉庫二十一廩牧二
十二關市二十三醫疾二十四獄官二十五營繕二十
六喪葬二十七雜令而大凡一千五百四十六條凡格
二十四篇式三十三篇以尚書御史臺九寺三監諸軍
為目凡律以正刑定罪令以設範立制格以禁違正邪
式以軌物程事乃立刑名之制五馬一笞二杖三徒四
流五死笞刑五杖刑五徒刑五流刑三死刑二而斷獄

之大典有十惡八議五聽六贓贖配之典具在刑法志
凡決死刑皆於中書門下詳覆凡死罪枷而杻婦人及
流徒枷而不杻官品及勲散之階第七已上鎖而不枷
在京諸司則徒已上送大理杖已下當司斷之若金吾
糺獲亦送大理凡決大辟罪在京者行決之司皆五覆
奏在外者刑部三覆奏若犯惡逆已上及部曲奴婢殺
主者一覆奏凡京城決囚之日減膳徹樂每歲立春後
至秋分不得決死刑大祭祀及致齋朔望上下弦二十

四氣雨未晴夜未明斷屠月日及休假亦如之凡犯流罪已下應除免官當未奏身死者免其追奪流移之人皆不得弃放妻妾及私遁還鄉至六載然後聽仕即本犯不應流而特配流者三載已後聽仕其應徒則皆配居作凡禁囚五日一慮凡鞠獄官與被鞠人有親屬讐嫌者皆聽更之凡在京諸司見禁囚每月二十五已前本司錄其所犯及禁時月日以報刑部凡國有赦宥之事先集囚徒於闕下命衛尉樹金雞待宣制訖乃釋之

都官郎中一員

從五品上龍朔改司僕大夫咸亨復

員外郎一員

從六品上

主

事二人

從九品上

令史九人書令史十二人掌固四人

郎

中員外郎之職掌配紀隸簿錄俘囚以給衣糧藥療以理訴競雪冤凡公私良賤必周知之凡叛逆相坐沒其家為官奴婢一免為蕃戶再免為雜戶三免為良民皆因赦宥所及則免之年六十及廢疾雖赦令不該亦並免為蕃戶七十則免為良人任所樂處而編附之凡初被沒有伎藝者各從其能而配諸司婦人工巧者入于

掖庭其餘無能咸隸司農

比部郎中一員

從五品上龍朔為司計大夫

員外郎一員

從六品上

主事

二人

從九品上

令史十四人書令史二十七人計史一人掌

固四人

郎中員外郎之職掌勾諸司百寮俸料公廨

贓贖調斂徒役課程逋懸數物周知內外之經費而總

勾之凡內外官料俸以品第高下為差外官以州縣府

之上中下為差凡稅天下戶錢以兗州縣官月料皆分

公廨本錢之利羈縻州所補漢官給以當土之物關監

之官以品第為差其給以年支輕貨鎮軍司馬判官俸
祿同京官鎮戍之官以鎮戍上中下為差凡京師有別
借食本每季一申省諸州歲終而申省比部總勾覆之
凡倉庫出內營造傭市丁匠功程贖贖賦斂勲賞賜與
軍資器仗和糴屯牧亦勾覆之

司門郎中一員

從五品上龍朔
曰司門大夫

員外郎一員

從六
品上

主事

二人

從九
品上

令史六人書令史十三人掌固四人

郎中

員外郎之職掌天下諸門及關出入往來之籍賦而審

其政凡關二十有六為上中下之差京城四面關有驛道者為上關餘關有驛道及四面無驛道者為中關他皆為下關關所以限中外隔華夷設險作固閑邪正禁者也凡關呵而不征司貨賄之出入其犯禁者舉其貨罰其人凡度關先經本部本司請過所在在京則省給之在外則州給之而雖非所部有來文者所在亦給

工部尚書一員

正三品南朝謂之起部有所營造則置起部尚書畢則省之隋初改置工部尚

書龍朔為司平太常伯光宅改為冬官尚書神龍復舊也

侍郎一員

正四品下龍朔為司平少常伯

尚書侍郎之職掌天下百工屯田山澤之政令其屬有四一曰工部二曰屯田三曰虞部四曰水部總其職務而行其制命凡中外百司之事由於所屬咸質正焉

郎中一員

從五品上龍朔為司平大夫也

員外郎一員

從六品上

主事二人

從九品上

令史十二人書令史二十一人亭長六人掌固八

人郎中員外郎之職掌經營興造之衆務凡城池之修濬土木之繕葺工匠之程式咸經度之凡京師東都有營繕則下少府將作以供其事

屯田郎中一員

從五品上龍朔為司田大夫也

員外郎一員

從六品上

主事

二人

從九品上

令史七人書令史十二人計史一人掌固四

人郎中員外郎之職掌天下屯田之政令凡邊防鎮

守轉運不給則設屯田以益軍儲其水陸腴瘠播種地

宜功庸煩省收率等級咸取決焉諸屯田役力各有程

數凡天下諸軍州管屯總九百九十有二大者五十頃

小者二十頃凡當屯之中地有良薄歲有豐儉各定為

三等凡屯皆有屯官屯副凡京文武職事官有職分田

京兆河南府及京縣官亦準此凡在京諸司有公廨田
皆視其品命而審其分給

虞部郎中一員

從五品上龍朔
為司虞大夫

員外郎一員

從六
品上

主事

二人

從九
品上

令史四人書令史九人掌固四人

郎中員

外郎之職掌京城街巷種植山澤苑囿草木薪炭供頓
田獵之事凡採捕漁獵必以其時凡京兆河南二都其
近為四郊三百里皆不得弋獵採捕殿中太僕所管閑
廐馬兩都皆五百里內供其芻藁其關內隴右西使南

使諸牧監馬牛駝羊皆貯橐及芟草其柴炭木撞進內
及供百官蕃客並於農隙納之

水部郎中一員

從五品上龍朔
為司川大夫

員外郎一員

從六品上

主事

二人

從九品上

令史四人書令史九人掌固四人

郎中員

外郎之職掌天下川瀆陂池之政令以導達溝洫堰決
河渠凡舟楫溉灌之利咸總而舉之凡天下水泉三億
二萬三千五百五十九其在遐荒絕域殆不可得而知
矣其江河自西極達于東溟中國之大川者也其餘百

三十五水是為中川其又千二百五十二水斯為小川也若渭洛汾濟漳淇淮漢皆亘達方域通濟舳艫從有

之無利於生人者也凡天下造舟之梁四

河則蒲津大陽河陽洛則

孝義

石柱之梁四

洛則天津永濟中橋霸則霸橋

木柱之梁三

皆渭川便橋中

渭橋東渭橋也

巨梁十有一皆國工修之其餘皆所管州縣隨

時營葺其大津無梁皆給船人量其大小難易以定其

差

門下省

秦漢初置侍中曾無臺省之名自晉始置門下省南北朝皆因之龍朔改為東臺光宅改為鸞

臺神

龍復

侍中二員

隋曰納言又名侍內武德為納言又改為侍中龍朔改東臺左相光宅元年改為納言神

龍復為侍中開元元年改為黃門監五年復為侍中天寶二年改為左相至德三年復改為侍中武德定令侍中正三品大歷二年十一月九日升為正二品舊制宰相常於門下省議事謂之政事堂永淳二年七月中書令裴炎以中書執政事筆遂移政事堂於中書省開元十一年中書令張說改政事堂為中書門下其政事印改為中書門下之印也

侍中之職掌出納帝命緝熙皇極總典

吏職贊相禮儀以和萬邦以弼庶務所謂佐天子而統大政者也凡軍國之務與中書令叅而總焉坐而論之

舉而行之此其大較也凡下之通上其制有六一曰奏抄二曰奏彈三曰露布四曰議五曰表六曰狀皆審署申覆而施行焉凡法駕行幸則負寶而從大朝會大祭祀則板奏中嚴外辨以為出入之節輿駕還宮則請解嚴所以告禮成也凡大祭祀皇帝致齋既朝則請就齋室將奠則奉玉及幣以進盥手則取匱以沃洗爵則酌盪水以奉及贊酌汎齊進福酒以成其禮焉若享宗廟則進瓚而贊酌鬱酒以裸既裸則贊酌醴齊其餘如饗

神祇之禮藉田則奉耒以贊事凡諸侯王及四夷之君
長朝見則承詔而勞問之臨軒命使冊后及太子則承
詔以命之凡制勅慰問外方之臣及徵召者則監其封
題若發驛遣使則給其傳符以通天下之信凡官爵廢
置刑政損益皆授之於記事之官既書於策則監其記
注焉凡文武職事六品已下所司進擬則量其階資校
其才用以審定之若擬職不當隨其優屈退而量焉

門下侍郎二員

隋曰黃門侍郎龍朔為東臺侍郎咸亨改為黃門侍郎垂拱改為鸞臺侍郎天

實二年改為門下侍郎乾元元年改為黃門侍郎大歷二年四月復為門下侍郎武德定令中書門下侍郎同尚書侍郎正四品上大歷二年九月勅昇為正三品也

門下侍郎掌貳侍中之

職凡政之弛張事之與奪皆叅議焉若大祭祀則從升壇以陪禮皇帝盥手則奉巾以進既悅則奠巾于篚奉瓠爵以賛獻凡元正冬至天子視朝則以天下祥瑞奏聞

給事中四員

正五品上隋曰給事郎置四員位次門下侍郎武德定令曰給事中龍朔改為東臺

舍人咸亨復

給事中掌陪侍左右分判省事凡百司奏抄

侍中審定則先讀而署之以駁正違失凡制勅宣行大事則稱揚德澤褒美功業覆奏而請施行小事則署而頒之凡國之大獄三司詳決若刑名不當輕重或失則援法例退而裁之凡發驛遣使則審其事宜與黃門侍郎給之其緩者給傳即不應給罷之凡文武六品已下授職官所司奏擬則校其仕歷淺深功狀殿最訪其德行量其才藝若官非其人理失其事則白侍中而退量焉若弘文館圖書之繕寫讎校亦課而察之凡天下冤

滯未申及官吏刻害者必聽其訟與御史中書舍人同

計其事宜而申理之錄事四人

從七品上

主事四人

從八品下令

史十一人書令史二十二人甲庫令史七人傳制八人

亭長六人掌固十人修補制勅匠五人

左散騎常侍二人

從三品魏晉置散騎常侍侍郎與侍中黃門侍郎共平尚書奏事其後用

人或雜江左不重此官或省或置隋初省散騎侍郎置常侍四人從三品掌陪從朝直煬帝又省之武德初以

為加官貞觀初置常侍二人隸門下省明慶二年又置二員隸中書省始有左右之號並金蟬珥貂左常侍與

侍中左貂右常侍與中書令右貂謂之八貂龍朔為左侍極咸亨復廣德二年五月昇為正三品加置四員興

元元年正月左右各加一員貞元四年正月勅依舊四員也

常侍掌侍奉規諷備

顧問應對

實應二年勅左右散騎常侍各置叅官兩人令自揀擇聞奏叅典亦置兩人後省

諫議大夫四員

秦漢曰諫大夫光武加議字隋於門下省置諫議大夫七員從四品下武德四

年勅置四員正五品上龍朔改為正諫大夫神龍復大歷四年勅只四員正五品上龍朔七年三月勅其諫議四員內供奉不得為正員至貞元四年五月十五日勅諫議分為左右加置八員四員隸門下為左會昌二年十一月月中書奏隨於門下省置諫議大夫七員從四品下今正五品上自大歷二年門下中書侍郎昇為正三品兩省遂闕四品官其諫議大夫望昇為正四品下分為左右以備兩省四品之闕向後與丞郎出入迭用以重其選勅可之

諫議大夫掌侍從替相規諫諷諭凡諫有五

一曰諷諫二曰順諫三曰規諫四曰致諫五曰直諫

起居郎二員

從六品上古無其名隋始置起居舍人二員貞觀二年省起居舍人移其職於門下

置起居郎二員明慶中又置起居舍人始與起居郎分在左右龍朔二年改為左史咸亨復天授元年又改為

左史神龍復也

楷書手三人

起居郎掌起居注錄天子之言

動法度以修記事之史凡記事之制以事繫日以日繫

月以月繫時以時繫年必書其朔日甲乙以紀歷數典

禮文物以考制度遷拜旌賞以勸善誅伐黜免以懲惡

季終則授之國史焉

自漢獻帝後歷代帝王有起居注著作編之每季為卷送史館也

左補闕二員

從七品上

左拾遺二員

從八品上古無此官名天后垂拱元年二月二

十九日勅記言書事每切於旁求補闕拾遺未弘於注選瞻言共理必藉衆才寄以登賢期之進善宜置左右補闕各二員從七品上左右拾遺各二員從八品上掌供奉諷諫行立次左右史之下仍附于令天授二年二月加置三員通前五員大歷四年補闕拾遺各置內供奉兩員七年五月十一日勅補闕拾遺宜各置兩員也

補闕拾遺之職掌供奉諷諫扈從乘輿凡發令與事

有不便於時不合于道大則廷議小則上封若賢良之

遺滯於下忠孝之不聞于上則條其事狀而薦言之

典儀二員

從九品南齊有典儀錄事一員梁有典儀之官後省皇朝又置典儀二人隸門下省初用

人皆輕貞觀末李義府為之自是用士人為之贊者十二人隋太常鴻臚二寺皆有贊者皇朝因

置之隸門下省掌贊唱為行事之節分番上下謂之番官典儀掌殿上贊唱之節

及殿廷版位之次凡國有大禮侍中行事及進中嚴外辦之版皆贊相焉

城門郎四員從六品上漢有城門校尉掌京城諸門啟閉之節隋改校尉為城門郎置四員從六

品皇朝因之也令史一人書令史二人門僕八百人門僕晉代有之皇朝

隸城門局分番上下掌送管鑰城門郎掌京城皇城宮殿諸門啟閉

之節奉出納管鑰開則先外而後內闔則先內而後外

所以重中禁尊皇居也候其晨昏擊鼓之節而啟閉之
凡皇城宮城闔門之鑰先酉而出後戌而入開門之鑰
後丑而出夜盡而入京城闔門之鑰後申而出先子而
入開門之鑰後子而出先卯而入若非其時而有命啟
閉則詣闔覆奏

符寶郎四員

從六品上周有典瑞之職秦有符璽令漢曰符璽郎兩漢得秦六璽及傳國璽後代

傳之隋置符璽郎二員從六品天后惡璽字改為寶其
受命傳國符八璽文並改彫寶字神龍初復為符璽郎
開元初又改為
符寶從璽文也令史二人書令史三人主寶六人主符

三十人主節十八人 符寶郎掌天子八寶及國之符
節辯其所用有事則請於內既事則奉而藏之八寶一
曰神寶所以承百王鎮萬國二曰受命寶所以修封禪
禮神祇三曰皇帝行寶答疏於王公則用之四曰皇帝
之寶勞來勲賢則用之五曰皇帝信寶徵召臣下則用
之六曰天子行寶答四夷書則用之七曰天子之寶慰
撫蠻夷則用之八曰天子信寶發番國兵則用之凡大
朝會則捧寶以進于御座車駕行幸則奉寶以從于黃

鉞之內凡國有大事則出納符節辯其左右之異藏其
左而班其右以合中外之契焉一曰銅魚符所以起軍
旅易守長二曰傳符所以給郵驛通制命三曰隨身魚
符所以明貴賤應徵召四曰木契所以重鎮守慎出納
五曰旌節所以委良能假賞罰魚符之制王畿之內左
三右一王畿之外左五右一左者在內右者在外行用
之以從第一為首後事頒
用以次發之
周而復始大事兼勅書小事但降符函封遣使合而
行之傳符之制太子監國曰雙龍之符左右各十京都

留守曰麟符左二十其右一十有九東方曰青龍之符

西方曰騶虞之符南方曰朱雀之符北方曰玄武之符

左四右三

左者進內
右者付外

隨身符之制左二右一太子以玉

親王以金庶官以銅佩以為飾刻姓名者去官而納焉

不刻者傳而佩之木契之制太子監國則王畿之內左

右各三王畿之外左右各五庶官鎮守則左右各十旌

節之制命大將帥及遣使於四方則請而佩之旌以專

賞節以專殺

周禮之制山國用虎節土國用人節澤國用龍節皆金也又云道路用旌節即漢使

所持者是也

弘文館

後漢有東觀魏有崇文館宋有立史二館南齊有總明館梁有士林館北齊有文林館後周有崇文館皆著撰文史鳩聚學徒之所也武德初置修文館後改為弘文館後避太子諱改曰昭文館開元七年

復為弘文館

隸門下省

學士

學士無員數自武德已來皆妙簡賢良為學士故事五品已上稱學士六品已上為直學士又有文

學直館學士不定員數館中有四部書及圖籍自垂拱已後皆宰相兼領號為館主常令給事中一人判館事

學生三十人校書郎二人

從九品上

令史二人楷書手三十

人典書二人搨書手三人筆匠三人熟紙裝潢匠九人

亭長二人掌固四人 弘文館學士掌詳正圖籍教授生徒凡朝廷有制度沿革禮儀輕重得參議焉 校書郎掌校理典籍刊正錯謬其學生教授考試如國子學之制焉

中書省

秦始皇置中書謁者漢元帝去謁者二字歷代但云中書後周謂之內史省隋因為內史省置內

史監令各一員煬帝改為內書省武德復為內史省三年改為中書省龍朔改為西臺光宅改為鳳閣神龍復為中書省開元元年改為紫微省五年復舊

中書令二員

漢魏品卑而付重魏置監令各一員歷南北朝不改隋省監置令二人正三品隋文帝

廢三公府寮令中書令與侍中知政事遂為宰相之職
隋曰內書令武德曰內史令尋改為中書令龍朔為西
臺右相咸亨復為中書令光宅為鳳閣令開元元年改
為紫微令五年復為中書令天寶改為右相至德二年
復為中書令本正三品大歷二年十一月
九日與侍中同昇正二品自後不改也 中書令之

職掌軍國之政令緝熙帝載統和天人入則告之出則
奉之以釐萬邦以度百揆蓋佐天下而執大政也凡王
言之制有七一曰冊書二曰制書三曰慰勞制書四曰
發勅五曰勅旨六曰論事勅書七曰勅牒皆宣署申覆
而施行之凡大祭祀羣神則從升壇以相禮享宗廟則

從升阼階親征纂嚴戒勅百寮冊命親賢臨軒則使讀冊若命之于朝則宣而授之凡冊太子則授璽凡制詔

宣傳文章獻納皆授之於記事之官

武德貞觀故事以尚書省左右僕射

各一人及侍中中書令各二人為知政事官其時以他官預議國政者云與宰相參議朝政或云平章國計或云專典機密或參議政事貞觀十七年李勣為太子詹事特詔同知政事始謂同中書門下三品自是僕射常帶此稱自餘非兩省長官預知政事者亦皆以此為名永淳中始詔郭正一郭待舉魏玄同等與中書門下同承受進止平章事自天后已後兩省長官及同中書門下三品并平章事為宰相其僕射不帶同中書門下三品者但釐尚書省而已總章二年東臺侍郎張文瓘西臺侍郎戴至德等始以同中書門下三品著之入銜自

是相承至今永淳二年黃門侍郎劉齊賢知政事稱同中書門下平章事自後兩省長官及他官執政未至侍中中書令者皆稱同中書門下平章事也

中書侍郎二員

漢置中書掌密詔有令僕丞郎四官魏曰中書郎晉加侍字隋置內書省改為

中書侍郎正四品武德初為內史侍郎三年改為中書侍郎龍朔先宅開元隨曹易號至德復為中書侍郎武德定令與尚書侍郎俱第四品大歷二年九月與門下侍郎共昇為正三品也

中書侍郎掌

貳令之職凡邦國之庶務朝廷之大政皆叅議焉凡臨軒冊命大臣令為之使則持冊書以授之凡四夷來朝臨軒則授其表疏升于西階而奏若獻贄幣則受之以

授於所司

中書舍人六員

正五品上曹魏於中書置通事一人掌呈奏按章高貴鄉公於通事下加舍人

二字晉於中書置舍人通事各一人自魏晉齊梁詔詔皆出於中書令中書侍郎中書通事舍人但掌呈奏而已或通事有文字者別勅知詔詔至梁武制詔專令舍人掌之兼去通事二字但云中書舍人隋曰內史舍人置八員掌制詔品第六尋升五品上煬帝改內書舍人置四員武德初為內史舍人三年改為中書舍人龍朔光宅開元

隨曹改易

舍人掌侍奉進奏參議表章凡詔旨勅制

及璽書冊命皆按典故起草進畫既下則署而行之其禁有四一曰漏泄二曰稽緩三曰違失四曰忘悞所以

重王命也制勅既行有悞則奏而正之凡大朝會諸方
起居則受其表狀而奏之國有大事若大剋捷及大祥
瑞百寮表賀亦如之凡冊命大臣于朝則使持節讀冊
命之凡將帥有功及有大賓客皆使勞問之凡察天下
寃滯與給事中及御史三司鞫其事凡百司奏議文武
考課皆預裁焉主書四人從七品上主事四人從八品上令史二
十五人書令史五十人傳制十人亭長十八人修補勅
匠五十人

右散騎常侍二員

從三品

右補闕二員

從七品上

右拾遺二員

從八品上起居舍人二員

從六品上

右常侍補闕拾遺掌事同

左省起居舍人掌修記言之史錄天子之制誥德音如記事之制以記時政損益季終則授之於國史

通事舍人十六人

從六品上通事舍人秦謁者之官也掌賓贊贊受事隸光祿勳晉置舍人

通事各一人隸中書東晉曰通事舍人隋因晉制置十六人從六品上又為通事謁者武德初廢謁者臺改通事謁者為通事舍人隸四方館屬中書省也

通事舍人掌朝見引納及辭

謝者於殿廷通奏凡近臣入侍文武就列引以進退而

告其拜起出入之節凡四方通表華夷納貢皆受而進之凡軍旅之出則命受慰勞而遣之既行則每月存問將士之家以視其疾苦凱旋則郊迓之皆復命凡致仕之臣與邦之耆老時巡問亦如之令史十人亭長十八人掌固二十四人

集賢殿書院

開元十二年置漢魏已來職在祕書梁於文德殿內藏聚羣書北齊有文林館學士

後周有麟趾殿學士皆掌著述隋平陳之後寫羣書正副二本藏于宮中其餘以實祕書外閣煬帝於東都觀文殿東西廂貯書自漢延嘉至隋皆祕書掌國籍而禁中之書時或有焉及太宗在藩府時有秦府學士十八

人其後弘文崇文二館皆有立宗即位大校羣書開元
五年於乾元殿東廊下寫四部書以充內庫置校定官
四人七年駕在東都於麗正殿置修書使十二年駕在
東都十三年與學士張說等宴於集仙殿因改名集賢
改修書使為集賢書院學士其大明宮所置書院本命
婦院屋宇宏敞永泰九年三月詔僕射裴冕等十三人
每日於集賢
書院待詔

集賢學士

初定制以五品已上官為學士六品已下為
直學士每宰相為學士者為知院事常侍一

人為副

學士知院事一人

開元初以褚无量馬懷素元
行冲相次知乾元殿寫書及

在麗正乃有使名張說代元行冲改院為集賢以說為
大學士知院事說懇讓大字詔許之自是每以宰相一

人知

副知院事一人

初宰相張說知院事以左常侍
徐堅為副知院事因為故事判

院一人

初在乾元殿刊正官一人判事其後因之

押院中使一人

自乾元殿寫書則置

掌出入宣進奏兼領中官監守院門掌同官禁

侍講學士

開元初褚无量馬懷素侍講禁中名為侍

讀其後康子元為侍講學士

修撰官校理官

並無常員以官人兼之

待制官

古

待詔金馬門是

留院官檢討官

皆以學士別勅留之

孔目官一人專知御

書典四人

並開元五年置

知書官八人

開元五年置掌分四庫書

書直寫御

書一百人搨書六人書直八人裝書直十四人造筆直

四人

並開元六年置

集賢學士之職掌刊緝古今之經籍以

辯明邦國之大典凡天下圖書之遺逸賢才之隱滯則

承旨而徵求焉其有籌策之可施於時著述之可行於代者較其才藝而考其學術而申表之凡承旨撰集文章校理經籍月終則進課于內歲終則考最於外

史館

歷代史官隸祕書省著作局皆著作郎掌修國史武德因隋舊制貞觀三年閏十二月始移史館於

禁中在門下省北宰相監修國史自是著作郎始罷史職及大明宮初成置史館於門下省之南館門下東西有棗樹七十四株無雜樹開元二十五年三月右相李林甫以中書地切樞密記事者官宜附近史官尹愔奏

移史館於中書省北以舊尚樂院充館也

史官

古者天子諸侯皆有史官以紀言動歷數之事至後漢明帝召當時名士入東觀撰光武紀而史官

因以他官兼之魏明帝始置著作郎專掌國史隸中書
晉改隸祕書省因而不改貞觀年修五代史移史館於
禁中史官無常員如有修撰大監修國史貞觀已後多
事則用他官兼之事畢日停

國史遂成
故事也

修撰直館

天寶已後他官兼領史職者謂之
史館修撰初入為直館也元和六

年宰相裴洎奏登朝官領史職者並為修撰未登朝官
入館者並為直館修撰中以一人官高者判館事其餘
名目並請
不置從之楷書手二十五人典書四人亭長二人掌固

六人裝潢直一人熟紙匠六人

史官掌修國史不虛

美不隱惡直書其事凡天地日月之祥山川封域之分
昭穆繼代之序禮樂師旅之事誅賞廢興之政皆本於

起居注時政記以為實錄然後立編年之體為褒貶焉
既終藏之于府

知匭使

天后垂拱元年置匭以達冤滯其制一房四面各以方色東曰延恩西曰申冤南曰招諫北曰

通玄所以申天下之冤滯達萬人之情狀蓋古進善旌諫謗木之意也天寶九年改匭為獻納乾元元年復名曰匭垂拱已來常以諫議大夫及補闕拾遺一人充使受納訴狀每日暮進內而晨出之也

翰林院

天子在大明宮其院在右銀臺門內在興慶宮院在金明門內若在西內院在顯福門若在東

都華清宮皆有待詔之所其待詔者有詞學經術合練僧道卜祝術藝書奕各別院以廩之日晚而退其所重者詞學武德貞觀時有溫大雅魏徵李百藥岑文本許敬宗褚遂良永徽後有許敬宗上官儀皆召入禁中驅

使未有名目乾封中劉懿之劉禕之兄弟周思茂元萬
項范履冰皆以文詞召入侍詔常於北門候進止時號
北門學士天后時蘇味道韋承慶皆待詔禁中中宗時
上官昭容獨當書詔之任睿宗時薛稷賈膺福崔湜又
代其任玄宗即位張說陸堅張九齡徐安貞張洎等召
入禁中謂之翰林待詔王者尊極一日萬幾四方進奏
中外表疏批荅或詔從中出宸翰所揮亦資其檢討謂
之視草故嘗簡當代士人以備顧問至德已後天下用
兵軍國多務深謀密詔皆從中出尤擇名士翰林學士
得充選者文士為榮亦如中書舍人例置學士六人內
擇年深德重者一人為承旨所以獨承密命故也德宗
好文尤難其選貞元已後為學士承旨者多至宰相馬
內教坊

武德已來置於禁中以按習雅樂以中官
人充使則天改為雲韶府神龍復為教坊

習藝館

本名內文學館選宮人有儒學者一人為學士
教習宮人則天改為習藝館又改為翰林內教

坊以事在
禁中故也

祕書省

隸中書之下漢代藏書之所
有延閣廣內石渠之藏又御史中丞在殿內掌蘭臺祕書圖籍後

漢桓帝延熹二年始置祕書監屬太常寺掌禁中圖書
祕文後併入中書至晉惠帝別置祕書寺掌中外二閣
圖書梁武改寺為省龍朔改為蘭臺
光宅改為麟臺神龍復為祕書省

祕書監一員

從三品監之名後漢桓帝置魏晉不改後
周謂之外史下大夫隋後為祕書監從第

三品煬帝改為祕書令武德復為監龍朔改為蘭
臺太史天授改為麟臺監神龍復為祕書監也
少監

二員

從四品上少監隋煬帝置龍朔改為蘭臺侍郎天
授為麟臺少監神龍復為祕書少監比置一員太

極初增置

丞一員

從五品上魏武帝置丞二
人隋置一人正第五品也

祕書監

之職掌邦國經籍圖書之事有二局一曰著作二曰太史皆率其屬而修其職少監為之貳丞掌判省事

祕書郎四員

從九品上

校書郎八人

正九品上

正字四人

正九品下

主

事一人

從九品上

令史四人書令史八人楷書手八十人亭

長六人掌固八人 祕書郎掌甲乙丙丁四部之圖籍

謂之四庫經庫類十史庫類十三子庫類十四集庫類

三

事在經籍志

著作局

龍朔為司文局

著作郎二人

從五品上龍朔為司文郎中咸亨復也

佐郎四人

從六品上

校書

郎二人

正九品上

正字二人

正九品下

楷書手五人掌固四人

著作郎佐郎掌修撰碑志祝文祭文與佐郎分判局事

也

司天臺

舊太史局隸祕書監龍朔二年改為祕閣局久視元年改為渾儀監景雲元年改為太史監復

為太史局隸祕書乾元元年三月十九日勅改太史監為司天臺改置官屬舊置於子城內祕書省西今在永

寧坊東

南角也

監一人

從三品本太史局令從五品下乾元元年改為監升從三品一如殿中祕書品秩也

少監

二人

本曰太史丞從七品下乾元升為少監與諸司少監卿同品也

太史令掌觀察

天文稽定歷數凡日月星辰之變風雲氣色之異率其

屬而占候之

其屬有司歷二人掌造歷保章正一人掌教歷生四十一人監候五人掌候天文觀

生九十人掌晝夜司候天文氣色

靈臺郎二人

掌教習天文氣色天文生六十人

挈壺正二人

掌知漏刻司辰七十

人漏刻典事二十二人漏刻博士九人漏刻生三百六十人典鐘一百一十二人典鼓八十八人楷書手二百六

亭長掌固各四人自乾元元年別置司天臺改置官吏不同太司局舊數今據司天職掌書之也

凡玄

象器物天文圖書苟非其任不得預焉每季錄所見災

祥送門下中書省入起居注歲終總錄封送史館每年預造來年歷頒于天下

五官正五員

正五品乾元元年置五官有春夏秋冬中五官之名

丞二員

正七品

主

簿二員

正七品

定額直五人五官靈臺郎五員

正七品舊靈臺郎正

八品下掌觀天文之變而占候之凡二十八宿分為十二次事具天文之志也

五官保章正員

五員

正七品

五官司歷五員

正八品舊司歷二人從九品上國之歷法造歷以頒四方

其歷有戊寅歷麟德歷神龍歷大衍歷天下之測量之處分至表準其詳可載故參考星度稽驗晷影各有典

章

五官監候五員

正八品

五官挈壺正五員

正九品

五官司

辰十五員

正九品舊挈壺正二員從八品下司辰十七人正九品下皆掌諸漏刻孔壺為漏浮箭為

刻以告中星昏明之候也

五官禮生十五人五官楷書手五人令史

五人漏刻博士二十人

漏刻之法孔壺為漏箭為刻其箭四十有八晝夜共百刻冬夏

之間有長短冬至之日晝漏四十刻夜漏六十刻夏至晝漏六十刻夜漏四十刻春秋分秋分之時晝夜各五十刻秋分之後減晝益夜凡九日加一刻春分已後減夜益晝九日減一刻二至前後加減遲用日多二分之間加減速用日少候夜以為更點之節每夜分為五更每更分為五點更以擊鼓為節點以擊鐘為節也


典

鐘典鼓三百五十人天文觀生九十人天文生五十人

歷生五十五人漏刻生四十人視品十人

已上官吏皆乾元元年隨監司

新置
也



舊唐書卷四十三

舊唐書卷四十三考證

職官志二王之女封縣主視正二品○新書從二品

考功令史十三人○新書十五人

書令史二十五人○新書三十人

倉部郎中二員○新書一員

令史九人書令史二十人○九人新書作十二人二十人新書作二十三人

祠部令史五人書令史十一人○五人新書作六人十

一人新書作十三人

駕部主事三人○新書二人

書令史二十人○新書二十四人

刑部員外郎二員○新書一員通考同舊書

比部主事二人○新書四人

工部主事二人○新書三人

門下省給事中令史十一人新書令史二十二人甲庫令

史七人傳制八人掌固十人○十一人新書作二十

二人二十二人新書作四十三人七人新書作十三人八人新書作二人十人新書作十四人

符寶郎一曰神寶所以承百王鎮萬國○新書車服志藏而不用

八曰天子信寶發番國兵則用之○新書車服志皆泥封

二曰傳符○新書車服志傳信符

弘文館學生三十人○新書三十八人

楷書手三十人裝潢匠九人掌固四人○三十人新書
作十二人九人新書作八人四人新書作二人
中書省右補闕二員右拾遺二員○新書皆六員
集賢殿書院書直寫御書一百人○新書九十人
知匭使乾元元年復名曰匭○新書在至德元載
祕書監祕書郎四員○新書三員

舊唐書卷四十三考證